



Komunikadu Imprensa
02 Outubru 2020

Membru Konsellu no Komunitade Suku Uma-Naruk preokupa ho kazu inestu

Iha 29 Setembru 2020, JSMP realiza treinamentu ba membru estrutura suku Uma-Naruk, Postu Administrativu Laçlo, Munisípiu Manatutu kona-ba demokrásia no asesu ba justisa formál. Aleinde ne'e, JSMP fahe mós informasaun kona-ba oinsa halo prevensaun ba Covid-19 ne'ebé Governu liuhosi Ministériu Saúde no Organizasaun Mundiál introdús ona hanesan fase liman ho sabaun, uza maskra no distánsia fíziku.

Partisipante sira iha treinamentu ne'e mai husi aldeia tolu, aldeia Hali-lacor, Uma-surat no Uma-naruk ho totál partisipante hamutuk ema na'in 16 ne'ebé kompostu hosi feto na'in 7 no mane na'in 9.

“Membru Konsellu Suku sira kaer papél ne'ebé importante iha suku hodi halo atendimentu ba kualkér problema kompleksu sira ne'ebé akontese iha sira-nia comunidade, tanba ne'e importante tebes atu sira hetan kapasitasaun no informasaun relasiona ho asuntu relevante sira hanesan ezemplu kazu inestu. Liuhusi mekanizmu sira hanesan ne'e bele hasa'e sira nia koñesimentu hodi sira bele dezempeña sira-nia knaar ho di'ak liu no efetivu. Iha parte seluk, sira mós bele hetan informasaun kona-ba oinsa halo prevensaun ba Covid-19,” dehan Ana Paula Marçal, Diretora Ezekutiva JSMP.

Materia ne'ebé mak apresenta no diskute iha sesaun dahuluk kona-ba demokrásia nian mak kona-ba definisaun Estadu, saida mak estadu halo, prosesu halo lei no oinsa bele hola parte iha prosesu halo lei ne'e. Enkuantu materia asesu ba justisa formál nian mak kona-ba definisaun direitu umanu no sistema justisa iha Timor-Leste.

Kestaun no preokupasaun sira ne'ebé partisipante sira koloka liga ho materia demokrásia mak kona-ba diferensia entre sistema prezidensiál no semi-prezidensiál, kestaun kona-ba sistema demokrásia ne'ebé viola no la respeita ema seluk nia direitu, planu governu atu harii edifísiu Parlamentu Nasionál. Enkuantu iha sesaun kona-ba asesu ba justisa formál, partisipante sira husu kona-ba krime ne'ebé aman halo relasaun seksuál ho nia oan rasik (inestu), no kazu inan no aman sira baku labarik sira tanba la rona inan-aman, karik ida ne'e kontra lei.

Hatan ba pergunta no preokupasaun sira ne'e, iha relasaun sistema prezidensiál no semi prezidensiál, JSMP esplika katak, sistema prezidensiál ne'e hanesan sistema ida ne'ebé opta demokrásia ida puru. Iha sistema ida ne'e órgaun Estadu nian kompostu husi órgaun Estadu tolu de'it mak hanesan, órgaun ezekutivu, lejislative no judikative. Prezidente Repúblika iha sistema ida ne'e nu'udar xefe ezekutivu ka governu aleinde hanesan xefe Estadu, ezemplu mak hanesan Indonezia. Enkuantu sistema semi-prezidensiál mak Timor-Leste nia sistema ne'ebé órgaun

estadu iha haat mak hanesan Prezidénsia Repúblika hanesan xefe estadu, Parlamentu Nasionál hanesa órgaun lejislativu, Governu hanesan órgaun ezekutivu no Tribunál hanesan órgaun judisiáriu.

Liga ho hanoin sira kona-ba demokrásia ne'ebé fó liberdade ba ema atu viola no la respeita ema seluk nia direitu, JSMP esplika katak iha demokrásia liberdade iha nia limitasaun no responsabilidade. Laiha ema ida iha liberdade atu viola fali ka la respeitu ema seluk nia liberdade. Liberdade nu'udar valór ida husi demokrásia ne'ebé asegura ema hotu livre espresa nia-an, hanoin no hakarak sein prejudika ka viola ema seluk nia direitu. Tanba ne'e labele uza sala demokrásia hodi viola fali valór no prinsipíu direitu umanu ne'ebé konsagra iha Konstituisaun no mós lei internasionál sira ne'ebé Timor Leste opta.

Iha relasaun ho preokupasaun kona-ba planu Governu atu harii edifísio ba Parlamentu Nasionál, JSMP informa ba partisipante sira katak, iniciativa ida ne'e importante no relevante tebes ba serbisu Parlamentu nian tanba ida ne'e sei asegura no promove serbisu Parlamentu nian ho di'ak liu tan no efetivu. Tuir observasaun JSMP nian, facilidade sira Parlamentu nian la kondusivu atu deputadu sira bele hala'o sira-nia serbisu ho diak, tanba espasu la adekua¹, tanba JSMP hanoin katak Timor ne'e tenke ba oin nune'e persiza iha dezvoltamentu.

Enkuantu pergunta sira kona-ba aman halo relasaun seksuál hasoru nia oan rasik, JSMP informa ba partisipante sira kona-ba esforsu sira ne'ebé JSMP no parseiru sira seluk halo kona-ba oinsa altera Kódigu Penál (KP) hodi kriminaliza inestu². Ida ne'e, tanba tuir KP oan ho idade menór deit mak lei proteze ka kriminaliza sein haree ba idade no konsentimentu. Tanba ne'e, JSMP iha tinan barak halo esforsu hodi husu ba Governu atu halo alterasaun ba KP hodi kriminaliza inestu sein haree ba idade no konsentimentu.

Enkuantu kestaun kona-ba inan-aman halo violénsia hasoru sira-nia oan, JSMP esplika katak hahalok ida ne'e krime públiku no kontra lei no esplika mós lei espesífiku ne'ebé regula krime sira ne'ebé akontese iha kontekstu doméstika (familiár): Lei Kontra Violénsia Doméstika (LVKD). Tanba ne'e, hahalok hanesan aman baku oan konsidera krime ho natureza públiku ne'ebé la depende ba keixa, signifika katak se de'it mak rona, haree no hatene kona-ba krime ne'e akontese iha obrigaun atu halo keixa no hahú husi parte polísia, ministériu públiku no tribunál la bele halo konsiliaun.

Iha abertura no enseramentu, xefe suku Uma-Naruk, Sr. Estanislao de Carvalho, agradese ba JSMP bele hili suku Uma-Naruk hodi fahe informasaun importante sira ne'e, tanba atividade ne'e primeiravés foin halo iha sira-nia suku.

Liután xefe suku mós husu ba partisipante sira atu aproveita didiak oportunidade ida ne'e hodi bele rona informasaun sira ne'ebé mak JSMP sei fahe ba ita durante loron ida no husu kuandu presiza klarifikasaun ruma. Xefe suku mós rekoñese tanba kestaun virus Covid-19, tanba ne'e

¹ JSMP press release ho titlu: JSMP apresia ho planu Prezidente Parlamentu Nasionálnian "Harii edifísio PN, hadi'a qualidade fiskalizaun no kria Komisaun Especializada Permanenteba Sidania" file:///C:/Users/JSMP-03/AppData/Local/Temp/PrJSMPApresiaPNHariEdifisioFONbaPN_TETUM.pdf

² JSMP nia relatoriu ho titlu: Nesesidade atu altera Kodigu Penal Timor-Leste: <file:///C:/Users/JSMP-03/AppData/Local/Temp/Relatoriu-Inestu-Versaun-Ikus.pdf> no relatoriu kona-ba inestu iha Timor-Leste: Krime ida ne'ebé lahetan rekonsentimentu: <file:///C:/Users/JSMP-03/AppData/Local/Temp/Inestu-ih-Timor-Leste-Agostu-2012.pdf>

labele mobiliza ema barak hodi bele tuir atividade ne'e, maibé fi'ar katak membru estrutura sira bele kontinua hatutan informasaun importante sira ba comunidade sira ne'ebé lahetan oportunidade hodi partisipa iha atividade ne'e.

Programa treinamentu ne'e hetan apoiu hosi Governu Timor-Leste liuhusi Fundu Sosiedade Sivil, Gabinete Primeiru Ministru.

Atu hetan informasaun liutan bele kontaktu:

Ana Paula Marçal

Diretora Ezekutiva JSMP

Email: ana@jsmp.tl

Telefone: 3323883 | 77040735

info@jsmp.tl

Website: <https://jsmp.tl/>